



Proxecto de Decreto XX/2021, do xx, polo que se crea a Xunta consultiva en materia de ordenación do territorio e urbanismo

Exposición de motivos

O artigo 39 do Estatuto de autonomía de Galicia establece que lle corresponde á comunidade autónoma a creación e estruturación da súa propia Administración pública, dentro dos principios xerais básicas do Estado. Pola súa parte, o artigo 41 indica que a comunidade autónoma exercerá as súas funcións administrativas por órganos ou entes dependentes da Xunta de Galicia.

A complexidade da ordenación do territorio e o urbanismo en Galicia e a crecente demanda dos concellos de Galicia de contar con un órgano de asesoramento e interpretación sobre aplicación e interpretación da materia vixente relativa á ordenación do territorio e urbanismo, aconsella que a comunidade autónoma dispoña dunha Xunta consultiva en materia de ordenación do territorio e urbanismo, creada pola Disposición adicional cuarta da Lei 2/2016, do 10 de febreiro, do Solo de Galicia, engadida pola Disposición derradeira décimo primeira da Lei 9/2021, do 25 de febreiro, de simplificación administrativa e de apoio á reactivación económica de Galicia.

A Xunta consultiva en materia de ordenación do territorio e urbanismo configúrase como un órgano consultivo, con funcións asesoras e de tutela da lexislación vixente, á vez que constitúe un instrumento útil para a elaboración de proxectos de disposicións legais, a adopción de medidas necesarias para a adecuada coordinación e normalización dos distintos instrumentos de ordenación do territorio e urbanísticos de Galicia. Asumirá tamén as funcións da Comisión Superior de Urbanismo de Galicia, a cal se integrará na Xunta Consultiva de Ordenación do Territorio e Urbanismo, en canto esta se constitúa.

Comprenderá dentro do seu ámbito de actuación a administración xeral da comunidade autónoma, as entidades locais galegas, así os organismos públicos e entidades de dereito público ou dependentes de ambas, os colexios profesionais e as organizacións empresariais.

Na composición, atribucións e funcionamento da Xunta Consultiva prima o carácter representativo desta, así como a cualificación profesional dos seus membros.

A súa adscrición formal realizarase á dirección xeral competente en materia de ordenación do territorio e urbanismo da consellería competente en materia de ordenación do territorio e urbanismo.

A creación da Xunta consultiva en materia de ordenación do territorio e urbanismo, facilitará aos distintos operadores técnicos e xurídicos relacionados coa ordenación do territorio e urbanismo o desenvolvemento das súas funcións, ao habilitarse un órgano consultivo específico que poida colaborar coas diferentes administracións e dar resposta ás cuestións que se sometan a súa consideración.

Cómpre poñer de manifesto que moitas actividades produtivas precisan, para o seu inicio



ou continuidade, a tramitación de diferentes expedientes administrativos que teñen por finalidade a obtención dun permiso, autorización ou licenza, polo tanto, expedientes administrativos necesarios para a realización de actividades económicas.

Esta Xunta consultiva contribuirá á axilización dos referidos expedientes na medida en que se prestará colaboración ante as dúbidas e cuestións que puidesen suscitarse na tramitación dos mesmos. En definitiva, o que se pretende é contribuír á simplificación, axilidade e eficacia na tramitación dos procedementos, no marco do principio de colaboración coas distintas entidades e administracións que así o precisen, a través do asesoramento naqueles aspectos que sexan requiridos, no marco das competencias da Comunidade Autónoma en materia de ordenación do territorio e urbanismo.

Por outro lado, ao ter que emitir informes e ditames preceptivos, tanto os que se establezan nas disposicións legais ou regulamentarias como os relativos ás disposicións legais e regulamentarias cuxa iniciativa lle corresponde ao centro directivo competente en materia de ordenación do territorio e urbanismo, asegúrase que a normativa e a súa interpretación sexa coherente co resto do ordenamento xurídico, creando un marco normativo estable que facilite o seu coñecemento e comprensión.

Polo exposto, este decreto axústase aos principios de boa regulación previstos no artigo 129 da Lei 39/2015, do 1 de outubro, do procedemento administrativo común das Administracións públicas e no artigo 37.a) da Lei 14/2013, do 16 de decembro, de racionalización do sector público autonómico, nos que se exige que "en todas as iniciativas normativas xustifícase a adecuación delas aos principios de necesidade, proporcionalidade, seguridade xurídica, transparencia e accesibilidade, simplicidade e eficacia."

O decreto conta con 17 artigos, divididos en seis capítulos, unha disposición adicional, unha disposición derogatoria e catro disposicións derradeiras.

O Capítulo I dispón a creación da Xunta Consultiva en materia de ordenación do territorio e urbanismo, recolléndose no Capítulo II as súas competencias.

O Capítulo III dedícase a regular a composición dos distintos órganos que conforman a Xunta consultiva, así como o nomeamento dos seus membros. Neste capítulo tamén se delimitan as competencias e funcións de cada un dos órganos.

O réxime xurídico da Xunta consultiva en materia de ordenación do territorio e urbanismo contense no Capítulo IV, regulando o réxime das convocatorias das sesións, a constitución dos órganos e adopción de acordos.

O Capítulo V está adicado aos informes e ditames que debe emitir, establecendo o carácter dos mesmos e o prazo para a súa emisión.

O Capítulo VI regula a memoria anual.

O texto finaliza cunha serie de disposicións, entre elas, unha disposición derradeira, na que se contempla a modificación do Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda en dous aspectos.





Por un lado, modifícase o dito decreto para efectuar as reestruturacións e cambios organizativos precisos na estrutura organizativa da Dirección Xeral de Ordenación do Territorio e Urbanismo, para dotar á Xunta Consultiva do persoal necesario para o desenvolvemento das súas funcións.

E, por outro lado, tamén se modifica aos efectos de incluír expresamente entre a relación de informes que son competencia da Dirección xeral de Ordenación do Territorio e Urbanismo, os informes en materia de costas que estaban regulados no Decreto 158/2005, do 2 de xuño, polo que se regulan as competencias autonómicas na zona de servidume de protección do dominio público marítimo-terrestre, derogado polo Decreto 97/2019, do 18 de xullo, polo que se regulan as competencias da Comunidade Autónoma de Galicia na zona de servidume de protección do dominio público marítimo-terrestre, e que non constan expresamente incluídos neste último.

Tamén se contemplan, entre outros extremos, que as referencias efectuadas na normativa vixente á Comisión Superior de Urbanismo de Galicia deberán entenderse realizadas á Xunta Consultiva dende a súa constitución; a habilitación para o seu desenvolvemento regulamentario; a constitución da Xunta Consultiva no prazo máximo de tres meses, e a entrada en vigor do decreto aos vinte días naturais da súa publicación.

Xa que logo, por proposta da Consellería de Medio Ambiente, Territorio e Vivenda, de acordo co ditame do Consello Consultivo de Galicia e logo da deliberación do Consello da Xunta de Galicia na súa reunión do día

DISPOÑO:

CAPÍTULO I

Creación da Xunta consultiva en materia de ordenación do territorio e urbanismo

Artigo 1. Creación

1. Consonante co establecido na disposición adicional cuarta da Lei 2/2016, do 10 de febreiro, do solo de Galicia, créase a Xunta consultiva en materia de ordenación do territorio e urbanismo (en diante, Xunta consultiva), adscrita á consellería competente en materia de ordenación do territorio e urbanismo, como órgano superior de carácter consultivo en materia de ordenación do territorio e urbanismo da administración xeral da comunidade autónoma de Galicia, así como dos organismos públicos e entidades de dereito público dela dependentes.

2. A Xunta consultiva poderá ser consultada polas entidades locais de Galicia e os organismos públicos dela dependentes, os colexios profesionais e as organizacións empresariais, segundo o establecido neste decreto.

CAPÍTULO II





Competencias

Artigo 2. Competencias da Xunta consultiva en materia de ordenación do territorio e urbanismo

Correspóndelle á Xunta consultiva as seguintes competencias:

- a) Emitir os informes que, con carácter preceptivo, veñan esixidos por calquera disposición legal ou regulamentaria, así como sobre cantos asuntos sexan sometidos a consulta pola persoa titular da consellería competente en materia de ordenación do territorio e urbanismo.
- b) O asesoramento e a emisión de ditames sobre a aplicación e interpretación da normativa vixente en materia de ordenación do territorio e urbanismo.
- c) Informar preceptivamente os proxectos e anteprojectos normativos que afecten á ordenación do territorio e urbanismo cuxa iniciativa corresponda ao centro directivo competente en materia de ordenación do territorio e urbanismo .
- d) Prestar asesoramento nos procedementos contencioso-administrativos en materia de ordenación do territorio e urbanismo nos cales a consellería competente en materia de urbanismo e ordenación do territorio sexa parte.
- e) Elaborar e propor instrucións e medidas que considere precisas para mellorar a eficacia da ordenación do territorio e o urbanismo na Administración xeral de Comunidade Autónoma autonómica e nas entidades locais, así como nos organismos e demais entidades de dereito público dependentes da comunidade autónoma.
- f) Realizar estudos e investigacións sobre ordenación do territorio e urbanismo, trasladando aos órganos competentes en materia de ordenación do territorio e urbanismo as recomendacións que deriven de aqueles.
- g) Aprobar e elevar a persoa titular da consellería competente en materia de ordenación do territorio e urbanismo, para a súa remisión ao Consello da Xunta, a memoria anual sobre a ordenación do territorio e urbanismo da comunidade autónoma, nos seus aspectos administrativos e técnicos, con proposta das medidas pertinentes para a mellora da eficacia na ordenación do territorio e no urbanismo.

CAPÍTULO III

Órganos e competencias

Artigo 3. Organización da Xunta Consultiva

1. Os órganos permanentes da Xunta Consultiva son a presidencia, vicepresidencia, o pleno, a comisión permanente e a secretaría xeral.





2. Poderán crearse comisións non permanentes, para o asesoramento, estudo e investigación de asuntos que, pola súa complexidade ou especial interese, se consideren necesarias pola presidencia.

Artigo 4. *Presidencia*

1. A Presidencia da Xunta consultiva exerceraa a persoa titular da consellería competente en materia de ordenación do territorio e urbanismo e terá as funcións que o artigo 16 da Lei 16/2010, do 17 de decembro, de organización e funcionamento da Administración xeral e do sector autonómico de Galicia, lles atribúe aos presidentes dos órganos colexiados, dirimindo co seu voto os empates.

2. Nos casos de vacante, ausencia, enfermidade ou outra causa legal, a persoa que ocupe a presidencia será substituída nas súas funcións pola persoa titular da vicepresidencia do pleno.

Artigo 5. *Vicepresidencia*

A vicepresidencia, con voz e voto, será exercida pola persoa titular da dirección xeral competente en materia de ordenación do territorio e urbanismo e exercerá as funcións da presidencia en caso de vacante, ausencia, enfermidade ou outra causa legal ou por delegación.

Artigo 6. *Composición do Pleno*

1. O pleno da Xunta consultiva terá a seguinte composición:

a) Presidencia: a persoa titular da presidencia.

b) Vicepresidencia: a persoa titular da vicepresidencia.

c) As seguintes vogalías:

1º. A persoa titular da dirección Asesoría Xurídica Xeral da Xunta de Galicia

2º. A persoa titular da dirección xeral competente en materia de administración local.

3º. A persoa titular da dirección xeral competente en materia de patrimonio cultural.

4º. A persoa titular da dirección xeral competente en materia de planificación enerxética e recursos naturais.

5º. A persoa titular da dirección xeral competente en materia de gandería, agricultura e industrias agroalimentarias.

6º. A persoa titular da dirección xeral competente en materia de planificación e ordenación forestal.





7º. A persoa titular da dirección xeral competente en materia de calidade ambiental, sostibilidade e cambio climático.

8º. A persoa titular da dirección xeral competente en materia de patrimonio natural.

9º. A persoa titular da dirección da Axencia de Protección da Legalidade Urbanística.

10º. A persoa titular da dirección do Instituto de Estudos do Territorio.

11º. A persoa titular da dirección do Instituto Galego de Vivenda e Solo.

12º. A persoa titular da dirección de Augas de Galicia.

13º. A persoa titular da dirección da Axencia Galega de Infraestruturas.

14º. Dúas persoas representantes da Federación Galega de Municipios e Provincias.

15º. A persoa titular da presidencia de cada unha das deputacións provinciais de Galicia

16º. Un vogal en representación de cada un dos colexios oficiais con competencias urbanísticas.

17º. A persoa titular da Secretaría Xeral da Xunta consultiva en materia de ordenación do territorio e urbanismo.

18º. Un/unha asesor/a xurídico/a da consellería competente en materia de urbanismo.

2. Poderán asistir ás sesións , con voz e sen voto:

a) A persoa titular da subdirección xeral con competencias en materia de urbanismo da consellería competente en materia de urbanismo.

b) A persoa titular da subdirección xeral con competencias en materia de ordenación do territorio da consellería competente en materia de ordenación do territorio.

3. A presidencia poderá convocar ás autoridades, a persoal funcionario e persoal técnico que estime conveniente para o mellor asesoramento da Xunta Consultiva.

Artigo 7. Nomeamento e substitución dos vogais do Pleno

1. As vogalías serán nomeadas pola persoa titular da Presidencia da Xunta consultiva, e, para aquelas que non o sexan por razón do cargo, o nomeamento realizarase por proposta das entidades nomeadas no apartado 1 do artigo 6.

2. A proposta de designación de vogal efectuada pola FEGAMP incluírá unha persoa como vogal titular e outra persoa como vogal suplente.

3. As designacións faranse procurando acadar unha presenza equilibrada de homes e mulleres na composición total da Xunta Consultiva.

4. No caso de que un órgano sexa suprimido ou substituído, será vogal do pleno a persoa representante da órgano que asuma as súas funcións ou o substitúa.





5. Poderán actuar en nome dos vogais, as persoas ás que legalmente corresponda a súa substitución ou, se é o caso, na que expresa e documentalmente se delegue, agás no caso do representante da FEGAMP, no que o vogal titular solo poderá ser substituído polo designado como suplente.

Artigo 8. Competencias do Pleno

Correspóndenlle ao Pleno as competencias sinaladas nos apartados a), c), e) , f) e g) do artigo 2.

Artigo 9. Comisión permanente

1. A comisión permanente terá a seguinte composición:

a) Presidencia: a persoa titular da Dirección Xeral de Ordenación del Territorio e Urbanismo, ou persoa na que documentalmente delegue entre as vogalías da comisión .

b) As seguintes vogalías:

1º. Un/unha asesor/a xurídico/a da consellería competente en materia de urbanismo.

2º. A persoa titular da dirección da Axencia de Protección da Legalidade Urbanística.

3º. A persoa titular da subdirección xeral competente en materia de urbanismo da consellería con atribucións en materia de ordenación do territorio e urbanismo.

4º. A persoa titular da subdirección xeral competente en materia de ordenación do territorio da consellería que teña atribucións en materia de ordenación do territorio e urbanismo.

5º. A persoa titular da Secretaría Xeral da Xunta consultiva, asumindo as funcións de secretaría do órgano.

2. No caso de que un órgano sexa substituído, será vogal da comisión permanente a persoa representante da órgano que o substitúa.

3. Poderán actuar en nome dos membros da comisión permanente as persoas ás que legalmente corresponda a súa substitución ou, se é o caso, na que expresa e documentalmente deleguen.

Artigo 10. Competencias da Comisión Permanente

Correspóndelle á comisión permanente as competencias sinaladas nos apartados b) e d) do artigo 2.

Artigo 11. Secretaría xeral





1. A Secretaría Xeral é o órgano de apoio técnico e administrativo da Xunta consultiva en materia de ordenación do territorio e urbanismo.
2. A persoa titular da secretaria xeral será a persoa titular da Subdirección Xeral de réxime xurídico e administrativo da dirección xeral competente en materia de ordenación do territorio e urbanismo da consellería competente en materia de ordenación do territorio e urbanismo.
3. A persoa titular da secretaria xeral deberá ser licenciada ou con grao en dereito, con experiencia en materia de ordenación do territorio e urbanismo. Asistirá con voz e voto ás reunións do pleno e da comisión permanente, estudará e elaborará as propostas de acordos en relación con asuntos e expedientes de competencia da Xunta Consultiva e, en xeral desenvolverá as demais funcións de conformidade co disposto no artigo 18 da Lei 16/2010, do 17 de decembro, de organización e funcionamento da Administración xeral de do sector público autonómico de Galicia.

CAPÍTULO IV

Réxime de funcionamento

Artigo 12. Réxime de funcionamento

O réxime de funcionamento dos órganos da Xunta consultiva axustarase, nos extremos non regulados expresamente neste decreto, ao establecido na Sección 3ª, do Capítulo I, do Título I da Lei 16/2010, do 17 de decembro, e Sección 3ª, do Capítulo II, do Título Preliminar da Lei 40/2015, de 1 de outubro, do réxime xurídico do sector público, ou normas que as substitúan, e será competente o Pleno da Xunta Consultiva para establecer ou complementar as súas propias normas de funcionamento.

Artigo 13. Réxime de convocatorias e sesións do Pleno e da Comisión permanente

1. O pleno da Xunta consultiva celebrará sesión ordinaria trimestralmente, e sesión extraordinaria cantas veces sexa necesario por iniciativa da persoa titular da presidencia.
2. A comisión permanente da Xunta consultiva celebrará sesión ordinaria unha vez ao mes e sesión extraordinaria cantas veces sexa necesario por iniciativa da persoa titular da presidencia.
3. Os membros do pleno e da comisión permanente da Xunta consultiva recibirán, cunha antelación mínima de corenta e oito horas, a convocatoria que conteña a orde do día da reunión xunto coa documentación necesaria para a súa deliberación cando sexa posible, así como a acta da sesión anterior para os efectos da súa aprobación, cando proceda.

Artigo 14. Constitución e adopción de acordos do Pleno e da comisión permanente



1. Para a válida constitución do pleno ou da comisión permanente, a efectos de celebración da sesión, deliberacións e toma de acordos, requirirase a presenza da persoa titular da presidencia e da persoa titular da secretaría ou, se é o caso, daquelas persoas que as substitúan, e da metade, cando menos do seu número legal de membros en primeira convocatoria e dun terzo do número legal de membros en segunda convocatoria.

2. En ambos órganos, os acordos adoptaranse por maioría de votos emitidos polos membros asistentes, salvo que por precepto expreso se esixa unha maioría cualificada, dirimindo os empates a persoa titular da Presidencia co seu voto.

CAPÍTULO V

Informes e ditames

Artigo 15. Petición de informes e ditames

1. A Xunta consultiva en materia de ordenación do territorio e urbanismo emitirá os seus informes por pedimento escrito:

- a) Das secretarías e direccións xerais dos departamentos da Xunta, ou direccións xerais ou das presidencias das entidades públicas vinculadas ou dependentes da Xunta de Galicia.
- b) Das persoas titulares da alcaldía ou presidencia das entidades locais de Galicia.
- c) Dos presidentes dos colexios profesionais e organizacións empresarias afectadas pola ordenación do territorio e urbanismo.

Xunto coa petición deberán achegarse cantos antecedentes, documentos e datos sexan necesarios para elaborar o informe.

2. As solicitudes de informe ou ditame deberán referirse a cuestións relativas á aplicación e interpretación da normativa vixente en materia de ordenación do territorio e urbanismo.

Artigo 16. Carácter e prazo dos informes e ditames

1. Os informes e ditames da Xunta consultiva en materia de ordenación do territorio e urbanismo non serán vinculantes, aínda que terán carácter de elemento interpretativo da norma ou situación obxecto de exame e aplicación.

2. As solicitudes de informes e ditames serán incluídos na orde do día da sesión ordinaria inmediata posterior que sexa convocada, sempre e cando transcorreran cando menos quince días hábiles para os asuntos de Pleno e dez días hábiles para os asuntos da comisión permanente, contados desde a recepción da solicitude, e de ser o caso, da documentación requirida para a emisión do informe ou ditame.

O anterior se entende sen prexuízo da posibilidade de convocatoria de sesión



extraordinaria nos asuntos de especial interese público ou de urxencia, por iniciativa da presidencia do órgano correspondente da Xunta Consultiva.

2. Os informes e ditames serán publicados na páxina web da Xunta de Galicia.

CAPÍTULO VI

Memorial anual

Artigo 17. Memoria anual

1. Anualmente a Secretaría xeral da Xunta Consultiva elaborará unha memoria baseándose nos informes e ditames emitidos, con proposta das medidas pertinentes para a mellora da eficacia na ordenación do territorio e no urbanismo.
2. O proxecto de memoria trasladarase aos vogais da comisión permanente, co obxecto de que poidan presentar as observacións que consideren convenientes.
3. A memoria será aprobada polo pleno e elevada á persoa titular da consellería competente en materia de ordenación do territorio e urbanismo, para a súa remisión ao Consello da Xunta . Posteriormente, publicarase na páxina web da Xunta consultiva.

Disposición adicional. Referencias da normativa vixente á Comisión Superior de Urbanismo de Galicia

Todas as referencias efectuadas na normativa vixente á Comisión Superior de Urbanismo de Galicia, entenderanse realizadas á Xunta Consultiva en materia de Ordenación do Territorio e Urbanismo dende o momento da súa constitución.

Disposición derogatoria. Derrogación normativa

Quedan derogadas cantas disposicións de igual ou inferior categoría se opoñan ao establecido neste decreto e, en particular, os artigos 12 a 16 do Decreto 143/2016, do 22 de setembro, polo que se aproba o Regulamento da Lei 2/2016, do 10 de febreiro, do solo de Galicia.

Disposición derradeira primeira. Modificación do decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda.

O Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda, queda modificado como segue:



Un. O artigo 3 apartado 2 letra a), cuxa nova redacción é a seguinte:

“a) A Xunta consultiva en materia de ordenación do territorio e urbanismo, creada pola disposición adicional cuarta da Lei 2/2016, do 10 de febreiro, do solo de Galicia, a cal foi modificada pola Disposición Final decimoprimeira da Lei 9/2021, de 25 de febreiro, de simplificación administrativa e de apoio á reactivación económica de Galicia”.

Dous. O artigo 13 apartado 1 letra f), queda redactado como segue:

“f) O apoio e asesoramento necesario á Xunta consultiva en materia de ordenación do territorio e urbanismo”.

Tres. O artigo 13 a letra n) apartado 1, cuxa nova redacción é a seguinte:

“n) O outorgamento de autorizacións administrativas na zona de servidume de protección do dominio público marítimo-terrestre, segundo o establecido na Lei 22/1988, do 28 de xullo, de costas, con excepción do establecido na Lei 7/2012, do 28 de xuño, de montes de Galicia, para as talas de árbores; e a emisión de informes preceptivos en materia de costas, nos seguintes supostos:

1º A emisión do informe autonómico nos procedementos de deslinde do dominio público marítimo-terrestre e as súas modificacións ou revisións e, en xeral, en todos aqueles que podan derivar nunha delimitación ou modificación das liñas de dominio público marítimo-terrestre ou das súas servidumes de protección.

2º A emisión de informe autonómico aos plans e normas de ordenación territorial e urbanística, así como as súas modificacións e revisións, cando incidan sobre as zonas de servidume de protección e de influencia do dominio público marítimo-terrestre.

3º A emisión de informe nos proxectos de obra promovidos pola Administración xeral do Estado ou a Administración Autonómica que afecten ao dominio público marítimo terrestre ou servidumes de protección ou tránsito.

4º En xeral, a emisión dos informes autonómicos requiridos en execución da normativa de costas, cando se refiran ao dominio público marítimo-terrestre ou ás súas zonas de servidume, que non estean previstos expresamente neste decreto e sempre que non estean atribuídos a outro órgano da administración autonómica.”

Catro. Suprímese a letra q) do número 1 do artigo 13.

Cinco. Suprímese o apartado 2.2. do artigo 13, denominado “Servizo Xurídico-Administrativo”.



Seis. Renuméranse os apartados do artigo 13 do seguinte xeito:

1. O número 2.3. do artigo 13, denominado "Servizo de Xestión Económica e Orzamentaria" pasa a ser o número 2.2.
2. O número 2.4. do artigo 13, denominado "Subdirección Xeral de Ordenación do Territorio", pasa a ser o número 2.3.
3. O número 2.5. "Subdirección Xeral de Urbanismo" pasa a ser o número 2.4.

Sete. Engádese un número 2.5. no artigo 13 , que queda redactado como segue:

"2.5. A Subdirección xeral do réxime xurídico e administrativo.

2.5.1. A Subdirección xeral do réxime xurídico e administrativo exercerá as seguintes funcións:

- a) As encomendadas á Dirección Xeral de Ordenación do Territorio e Urbanismo no que incumbe á área xurídico-administrativa.
- b) A elaboración de informes sobre os recursos interpostos contra resolucións ditadas pola persoa titular da Dirección Xeral de Ordenación do Territorio e Urbanismo nas materias da súa competencia.
- c) As correspondentes á secretaría xeral da Xunta Consultiva de Ordenación do Territorio e Urbanismo.
- d) En xeral, prestarlle asistencia e xestionar cantos asuntos lle sexan encomendados, por razón da súa competencia, pola persoa titular da Dirección Xeral de Ordenación do Territorio e Urbanismo.

2.5.2. Para o desenvolvemento das funcións antes relacionadas, a Subdirección xeral do réxime xurídico e administrativo contará, co nivel orgánico de servizo, coas seguintes unidades:

2.5.2.1. O Servizo de apoio xurídico- administrativo.

2.5.2.2. O Servizo de apoio técnico.

Disposición derradeira segunda. *Habilitación normativa*

Autorízase á persoa titular da consellería en materia de ordenación do territorio a ditar as disposicións necesarias para o desenvolvemento desta norma.

Disposición derradeira terceira. *Constitución da Xunta consultiva en materia de ordenación do territorio e urbanismo.*

1. A Xunta consultiva en materia de ordenación do territorio e urbanismo constituirase nun



XUNTA DE GALICIA

CONSELLERÍA DE MEDIO AMBIENTE,
TERRITORIO E VIVENDA
Dirección Xeral de
Ordenación do Territorio e Urbanismo

Edificio administrativo San Caetano, s/n
15781 Santiago de Compostela



prazo máximo de tres meses desde a entrada en vigor deste decreto.

2. A Comisión Superior de Urbanismo de Galicia, prevista no artigo 9 da Lei 2/2016, do 10 de febreiro, do solo de Galicia, pasará a integrarse na Xunta consultiva no momento da súa constitución, asumindo esta as funcións que correspondían á Comisión Superior de Urbanismo de Galicia.

Disposición derradeira cuarta. *Entrada en vigor*

Este decreto entrará en vigor aos vinte días naturais desde a súa publicación no Diario Oficial de Galicia.

Santiago de Compostela,

Alberto Núñez Feijóo

Presidente

Ángeles Vázquez Mejuto

Conselleira de Medio Ambiente, Territorio e Vivenda